

**არასაარჩევნო პერიოდში აჭარის ავტონომიური რესპუბლიკის უმაღლესი საარჩევნო კომისიის სხდომებზე დასწრების და კომისიის სხდომების გადაღების მიზნით პრესისა და მასობრივი ინფორმაციის სხვა საშუალებათა აკრედიტაციის წესი**

**მუხლი 1. რეგულირების სფერო**

1. ამ წესის მიზანს წარმოადგენს არასაარჩევნო პერიოდში საარჩევნო კომისიის სხდომებზე დასწრების და კომისიის სხდომების გადაღების მიზნით პრესისა და მასობრივი ინფორმაციის სხვა საშუალებათა (შემდგომში – „მედიასაშუალებები“) აკრედიტაცია.

2. არასაარჩევნო პერიოდში აკრედიტაციის მოსაპოვებლად, განაცხადების წარდგენა უმაღლეს საარჩევნო კომისიაში, შესაძლებელია სამუშაო დღის 18:00 საათამდე.

3. აკრედიტაციის მოსაპოვებლად შესაბამისი ინფორმაცია და საჭირო დოკუმენტაციის ჩამონათვალი, აგრეთვე განაცხადის წარდგენის წესი ქვეყნდება უსკოს საზოგადოებასთან ურთიერთობის განყოფილების მიერ უსკოს ოფიციალურ ვებგვერდზე.

**მუხლი 2. ტერმინთა განმარტება**

ამ დადგენილებაში გამოყენებულ ტერმინებს აქვთ შემდეგი მნიშვნელობა:

ა) არასაარჩევნო პერიოდი – კალენდარული წელი, გარდა აჭარის ავტონომიური რესპუბლიკის კანონით „აჭარის ავტონომიური რესპუბლიკის უმაღლესი საბჭოს არჩევნების შესახებ“ განსაზღვრული საარჩევნო პერიოდისა;

ბ) საარჩევნო კომისია – აჭარის ავტონომიური რესპუბლიკის უმაღლესი საარჩევნო კომისია შემდგომში - უსკო.

**მუხლი 3. აკრედიტაცია**

1. უსკოს სხდომაზე დასწრების და კომისიის სხდომების გადაღების მიზნით მედიასაშუალებების წარმომადგენლების აკრედიტაციას ახორციელებს უსკოს მდივანი.

2. საარჩევნო კომისიაში აკრედიტაციის მისაღებად, მედიასაშუალებების ხელმძღვანელმა პირმა ორგანიზაციის სატიტულო ფურცელზე შესრულებული განცხადება უნდა წარადგინოს უსკოს მდივნის სახელზე.

3. უსკოს მდივანი, განცხადებას აკრედიტაციის გაცემის თაობაზე განიხილავს და გადაწყვეტილებას იღებს შესაბამისი განაცხადის კომისიაში შემოსვლიდან არაუადრეს 7 და არაუგვიანეს 14 სამუშაო დღისა, რომელიც ფორმდება უსკოს მდივნის განკარგულებით.

4. ერთ მედიასაშუალებას საარჩევნო კომისიის სხდომაზე დასწრებისა და კომისიის სხდომაზე გადაღების მიზნით შეუძლია აკრედიტაციისათვის წარადგინოს მედიასაშუალებების წარმომადგენელთა სია, რომელთაგან ერთდროულად არაუმეტეს 3 წარმომადგენლისა ესწრება კომისიის სხდომას.

5. განცხადებას უნდა დაერთოს საჯარო რეესტრის ეროვნული სააგენტოს მიერ, უსკოში განცხადების წარდგენამდე, ბოლო 10 დღის ვადაში გაცემული ამონაწერი მედიასაშუალებების სააგენტოში რეგისტრაციის შესახებ, ხოლო, საქართველოს კანონმდებლობის შესაბამისად, სახელმწიფო ქონების საფუძველზე ტელერადიომუწყებლობისათვის შექმნილი საჯარო სამართლის იურიდიული პირების შემთხვევაში განცხადებას უნდა დაერთოს განცხადების ხელმძღვანელი პირის წარმომადგენლობაზე/ხელმძღვანელობაზე უფლებამოსილების დამადასტურებელი დოკუმენტი.

6. განცხადებაში აღნიშნული უნდა იყოს:

ა) მედიასაშუალებების სრული დასახელება;

ბ) მედიასაშუალებების წარმომადგენელთა სია (სახელი, გვარი, პირადი ნომერი);

გ) მედიასაშუალებების საფოსტო მისამართი, საკონტაქტო ტელეფონი, ასევე ელექტრონული ფოსტის მისამართი და ვებგვერდის დასახელება (ასეთის არსებობის შემთხვევაში).

7. განაცხადის ფორმას უნდა დაერთოს შემდეგი დოკუმენტაცია:

ა) მედიასაშუალებების წარმომადგენელთა პირადობის მოწმობის/პასპორტის ფოტოასლები;

ბ) მედიასაშუალებების წარმომადგენლების ფოტოსურათების ელექტრონული ვერსია, ზომით 3x4.

8. იმ შემთხვევაში, თუ წარმოდგენილი განცხადება ან/და ამ მუხლის მე-4-მე-7 პუნქტებით განსაზღვრული დოკუმენტაცია არ შეესაბამება ამ დადგენილებით გათვალისწინებულ მოთხოვნებს, მედიასაშუალებას/მედიასაშუალებების შესაბამის წარმომადგენელს უარი ეთქმება აკრედიტაციის მიღებაზე.

9. აკრედიტაციაზე უარის თქმის შემთხვევაში უსკოს მდივანი გადაწყვეტილების მიღებიდან ერთი დღის ვადაში მედიასაშუალებას, მისი მოთხოვნის შემთხვევაში გადასცემს სათანადო განკარგულებას.

#### **მუხლი 4. აკრედიტაციის დამადასტურებელი მოწმობის გაცემის პირობები**

აკრედიტაციის მოწმობების გაცემას უსკოში უზრუნველყოფს - უსკოს საზოგადოებასთან ურთიერთობის განყოფილება.

#### **მუხლი 5. აკრედიტაციის დამადასტურებელი მოწმობის ვადა**

1.

აკრედიტაციის დამადასტურებელი მოწმობის ვადაა აკრედიტაციის მოწმობის გაცემიდან 1 წელი.

2. საარჩევნო პერიოდში მედიასაშუალებების ამ წესით დადგენილი აკრედიტაციის მოქმედება ჩერდება და მათი მოქმედება განახლდება საარჩევნო პერიოდის დასრულებიდან აკრედიტაციის დამადასტურებელი მოწმობის მოქმედების ვადით.

3. ამ დადგენილებით განსაზღვრული წესით მიღებული აკრედიტაციის მოქმედება შეჩერდება შუალედური არჩევნების პერიოდში და განახლდება შესაბამისი საარჩევნო პერიოდის დასრულებიდან აკრედიტაციის დამადასტურებელი მოწმობის მოქმედების ვადით.

4. მედიასაშუალებების აკრედიტაცია საარჩევნო პერიოდში განისაზღვრება „აჭარის ავტონომიური რესპუბლიკის უმაღლესი საბჭოს არჩევნების შესახებ“ აჭარის ავტონომიური რესპუბლიკის კანონის 50-ე მუხლის შესაბამისად.

#### **მუხლი 6. აკრედიტაციის დამადასტურებელი მოწმობის ფორმა**

1. აკრედიტაციის დამადასტურებელი მოწმობის ფორმა მტკიცდება უსკოს განკარგულებით და ძალაშია მედიასაშუალებების წარმომადგენლის პირადობის მოწმობასთან/პასპორტთან ერთად.

2. სააკრედიტაციო მოწმობის დაკარგვის შემთხვევაში, მედიასაშუალებების ხელმძღვანელი, ვალდებულია ამის შესახებ აცნობოს უსკოს. ახალი მოწმობის გაცემის საკითხი განიხილება 14 სამუშაო დღის განმავლობაში.

#### **მუხლი 7. წარმომადგენლების შეცვლა/დამატება**

აკრედიტებული მედიასაშუალებების მიერ, წარმომადგენლების შეცვლა/დამატება, შესაძლებელია ამ აკრედიტებული მედიასაშუალებების მიერ წარდგენილი წერილობითი განცხადების საფუძველზე, ამ წესით განსაზღვრული პროცედურების გათვალისწინებით.

#### **მუხლი 8. აკრედიტებული მედიასაშუალებისთვის აკრედიტაციის გაუქმება**

1. აკრედიტებული მედიასაშუალების წარმომადგენლის ცვლილების შემთხვევაში, მედიასაშუალება ვალდებულია აცნობოს უსკოს, რის თაობაზეც კომისიის მდივანი გამოსცემს აქტს, ამ პირის რეგისტრაციის გაუქმების შესახებ.

2. მედიასაშუალებამ, აკრედიტაციის გაუქმების შემთხვევაში, უნდა მიმართოს უსკოს მდივანს. აკრედიტაციის გაუქმების საკითხის განხილვაზე მოქმედებს იგივე ვადები, რაც განსაზღვრულია აკრედიტაციისთვის.